

齊

乘



重刊齊乘序

凡著述必有關於民生風教斯能動鬼神共古今而不朽而又有數與命焉益都先有元魏時賈思勰其家思伯思同竝有列傳載于魏書而思勰獨無思伯有明堂禮議思同有春秋左氏辨十卷皆不可得見而思勰之齊民要術獨傳自思勰後近千年有元侍郎于欽齊乘于之名不見于元史且史志不及藝文經籍而明史志藝文又不及前代之書故元人著述散而無紀其傳于今者轉不及唐宋之多而齊乘于今特著豈非命乎數乎又聞于之爲此書也夢有趙先生者謂曰君修齊乘僕有一良友葬安邱其人節義高天下請載之以勵末

齊乘序

一

俗覺而異之閱趙岐傳始知爲孫賓石也豈非著述有關係者鬼神亦爲之默贊邪夫表揚前哲諷勵風俗有司之職也余向權知青州篋中先有是書思付之梓以廣其傳匆匆未暇頃蒙

恩改守登州道出益都與明府周君兩媿偶言及是君與余有同志遂愆憑以成之原書中常有舛誤之處君又爲考證若干條附于各卷之後乃剗劂方竣忽赴修文考證僅具草藁余頗爲是書惜而君有賢子字繼千力成其先人之志真所謂克紹其家學者按是書初刻于于公子潛明嘉靖甲子青州守四明杜公又爲重刻然流傳者大都寫本非好古家不能有今得明府喬梓表章

之功庶幾流傳益廣矣而齊民要術則早入 四庫之
藏且有聚珍印本風行宇內此固其著述之精英有不
可泯滅而非遇

盛世右文恐亦湮沒而勿章是又其書之命與數矣乾隆
四十六年九月初議大夫登州府知府前進士桂林胡
德琳序

齊乘序

二

元序

齊乘六卷故兵部侍郎于公志齊之山川風土郡邑城郭亭館邱壠人物而作也古者郡各有志中土多兵難書弗克存我國家大德初始從集賢待制趙忭之請作大一統志蓋欲盡述天下都邑之盛書成藏之祕府世莫得而見焉于公生于齊官于齊考訂古今質以見聞歲久始克成編辭約而事核公在中朝爲御史憲臺都事左司員外郎終益都田賦總管以文雅擅名當時既卒其家蕭然獨遺是書于其子潛余官維揚始得閱之嗚呼齊地之疆民物之夥自古然也桓公任管仲以成霸業聖人嘗稱其功謂一變能至于魯後世去古雖遠

齊乘序

卷之一

一

山川郡邑猶存革其俗以化其民獨不在夫上之人乎當漢之始兵戈甫定曹參爲齊相師禮蓋公以清靜化民齊乃大治茲非其效歟今齊爲山東重鎮所統郡縣五十有九宦游于齊者獲是書觀之寧無益乎予于公之言重有感焉謂三代兩漢人材本乎學校之教養謂風俗自漢晉以降愈變而愈下美昔人之賑饑有道歎近世之採金病民以稷公之志矣夫公諱欽字思容僊惑于神異斯亦足以槩公之志矣夫公諱欽字思容益都人潛擢南行臺掾云

至元五年己卯冬十月丙戌朔嘉議大夫江北淮東道

肅政廉訪使蘇天爵序

舊刻序

于思容氏齊乘凡六卷曰沿革曰郡邑曰古蹟曰亭館曰土俗曰人物繫全齊者蓋略備矣青州故齊都也二百年來顧獨無志歲在甲子蒐羅圖籍期勒成編而乘出敝篋中郡志之作大都本此余竊思唐世柳史燼于兵燹劉煦繼修遂成一代之典歐宋更之號稱新史而煦史遂廢論者謂新舊二史互有得失煦史近蕪事詞稍備歐宋簡潔刻削甚矣至於驪山命相問答委備中興神采炳若丹青較之歐宋似或勝之而乃并此廢焉是可惜也況思容氏採輯參究上下數千餘年離合同異各有義意其尤得者黜齊奴退少翁表轅鄒辨王貢

齊乘舊序

一

賁師範罪張賔訂九河之未沒遠邁蔡沈謂佛說之乘虛獨宗孟氏雖其紛如孟陽去取稍謬營邱緣陵牽合竟迷然余嘗謂其志山水似景純述人物似靖節亦近世之良史歟余固不忍以世之廢煦者廢乘也

嘉靖甲子仲冬長至賜進士第中憲大夫青州府知府四明杜思子睿撰

齊乘目錄

沿革

分野

山川

山水

郡邑

古蹟

城郭亭館

邱壠

風土

人物

齊乘

目錄

齊乘卷之一

益都于欽思容纂

沿革

帝嚳九州之制青州初履海岱禹貢九州曰海岱惟青州謂東北跨海西南距岱少陽之方其色為青故以名也舜肇十二州以青越海析遼東為營商制九有以青為徐周官職方以徐為青其東北為幽州齊則囊括青州襟帶徐兗幽營非所兼也古之國於此者少昊之世有爽鳩氏虞夏有季荊商有逢公柏陵薄姑氏皆為諸侯周武王克商封太公呂尚于齊未得薄姑之地成王時薄姑與四國作亂成王滅之益

齊乘

卷之一

一

封太公遂有全齊漢志曰齊所以為齊以天齊也蓋臨淄有天齊淵以此建國命名耳管仲曰昔召康公命我先君太公曰五侯九伯汝實征之以夾輔周室賜我先君履東至于海西至于河南至于穆陵北至

于無棣

穆陵即大岷山或以為泰山南龜山北之穆陵山非也或又以為光州固始縣南之穆陵

關不應如是之遠元和志云齊陳二境置此關以為防禁隋平陳始廢然則南北朝之關塞耳以為古齊

履可乎蘇秦曰齊南有泰山東有琅邪西有清河北有

渤海四塞之國地方二千里此其疆域也太公後二十九世疆臣田和篡齊自立五世為秦所滅始皇郡縣天下始置齊郡又析置琅邪沂密秦亡齊分為三齊王田都據臨淄濟北王安據博陽膠東王市據即墨

故號三齊

劉貢父云益都為天齊濟南為中齊沂海為南齊非是

漢高初假韓

信繼封子肥為齊王有齊七十餘城後置青州刺史部領齊郡北海千乘濟南平原東萊膠東高密淄川郡國凡九而不常所理琅邪東海則為徐州之郡遼

東邊郡嘗來屬焉

光武十三年以遼東屬青州二十四年還屬幽州

三國時

齊為魏有晉置青州刺史領齊國濟南樂安城陽東萊五郡而理臨淄琅邪東莞亦為徐郡永嘉之亂青及徐州之半陷于劉曜石勒厥後慕容燕苻秦迭據其地秦敗苻朗以青州降晉改置幽州以辟閭渾為刺史鎮廣固隆安四年為慕容德所陷德稱南燕定都廣固二世為劉裕所滅西濟東海復為晉土而祚

齊乘

卷之一

二

移于劉氏矣劉宋置青冀二州青理臨淄冀理歷城至明帝時二州及琅邪之地竝沒于元魏魏置青齊膠光北徐州宇文周置齊郡樂安北海郡隋開皇初郡廢復為州大業初州廢復為北海高密齊郡琅邪東萊五郡唐武德初郡廢為青齊淄濰牟密登萊沂等州青齊置二總管府後罷總管為都督府貞觀初罷都督天寶初復為北海密濟南淄川東牟東萊琅邪郡屬河南道青州又升平盧節度石晉青州仍為平盧節度齊密二州則為防禦宋置青密齊沂登萊濰淄八州屬京東東路升青州為鎮海軍密州安化軍齊州興德軍元祐三年安化改臨海軍政和元

年鎮海軍復爲齊郡六年以齊州爲英宗賜履之地
升爲濟南府建炎元年京東路青州爲帥府濟南爲
要郡登萊沂密爲次要郡

從李綱所請京輔之外建
十六帥府時天下之勢已
去干寶所謂非命世雄才不能
復取綱策雖善豈高宗能辦哉 金人初入中原詭立

宋濟南知府劉豫爲齊帝兼八州之地八年廢之置
益都濟南二府立山東東路統軍司于益都轄十三

州焉

濰密莒寧海登
萊沂海濱棣清滄

國初以濟南益都立二帥府

益都仍行省事後竝廢置益都濟南般陽三路總管
府割德州寧海爲隸省之州四分齊境立宣慰司于
益都以鎮之廉訪司于濟南以按治之屬山東東西
道皆古全齊之地也其詳則各隨郡縣以載焉其舊

齊乘

卷之一

三

屬齊邑今割入他郡者亦別附見云

分野

地志曰虛危爲齊分星曰元枵宮曰寶餅時曰子州
曰青魏陳卓分郡國所入宿度齊國入虛六度北海
入虛九度濟南入危一度樂安入危四度東萊入危
九度平原入危十一度淄川入危十四度魯分徐州
屬齊者東海入奎一度琅邪入奎六度高密入婁一
度城陽入婁九度膠東入胃一度又唐一行山河兩
界圖曰河爲北河江爲南河自北河下流南距岱山
爲三齊自南河下流北距岱山爲鄒魯皆負海之國
貨殖之所阜也觀兩河之象與雲漢之所終始而分

野可知矣春秋運斗樞曰虛危之精流爲青州分爲
齊國立爲萊山其川淮泗其浸沂沭音述又其利蒲
魚兗之浸曰盧維幽之浸曰菑澍藪曰獫狁

山川

禹貢青州曰嵎夷既略濰淄其道徐州曰淮沂其乂
蒙羽其藝嶧陽孤桐皆今齊境山川也取法于經則
沂山見周禮爲青州之鎮故冠諸山濰淄二水青之
大川故爲衆水之長次則經傳圖志所載與夫古志
或遺而高大可稱者皆在所書其餘則略祠宇古迹
之類因山川而互見者不復重出云

益都山

齊乘

卷之一

四

沂山 臨朐縣南百里周禮職方氏青州其山鎮曰沂
山註曰沂水所出乃取名也漢志朱虛縣東泰山汶
水所出酈道元水經曰大弁山與東泰山連麓沭水

出焉以二水證之卽公玉帶

公玉帶濟南人公玉姓帶名玉一音肅見史記

武帝紀註

請漢武所封之東泰山也然漢志謂卑小不稱

其聲者蓋沂山遠望之則高壓羣山緣坡麓鼻衍八
九十里以漸而升逮至其顛則失其峻極耳又左思
齊都賦云神嶽造天惟此山可以當之疑亦因東泰
山而得嶽名山頂有二冢相傳周穆王葬宮嬪于此
故大峴關因號穆陵云按周初封太公已有南至穆
陵之履豈由穆妃而得名乎蓋二冢不知誰氏之葬

反因穆陵而附會也山半有東鎮東安王廟石刻神像俗傳趙太祖微時鬪韓通于此棄衣而石翁媪收之神像猶作臂衣之形故又云翁婆廟本卽沂山之神歷代封祀有典碑志具存而俚俗誕妄如此不經甚矣

大峴山 卽穆陵關也沂山東南曰大弁山大弁今人訛作大屏字相類而誤唐沈亞之沂水襍記又訛作太平山因頂平八九十里故云當從水經作大弁者是大弁東南卽大峴也其山峻狹僅容一軌故爲齊南天險劉裕伐南燕兵過大峴指天而喜曰虜已入吾掌中卽此山也山北數里有裕祭天五壇

齊乘

卷之一

五

仰天山 臨胸南七十里有黑龍洞縣邑禱雨輒應宋碑云元符三年勅額靈澤廟崇寧五年封濟侯

逢山 臨胸西十里按路史逢伯陵姜姓炎帝後太姜所出始封于逢在開封逢澤後改封于齊猶稱逢公山因名焉有逢公祠漢志云祠逢山石社石鼓于臨胸山舊有石鼓或擊而有聲則齊亂今不存矣其山四面斗絕惟一徑可登且有泉金末避兵于此者多獲免

靈山 臨胸東北廿里晏子春秋云齊大旱景公曰卜祟在高山廣澤寡人欲祀靈山可乎晏子曰靈山以石爲身草木爲毛髮天久不雨髮將焦枯身將焚獨

不欲雨乎祀之何益蓋此山也

凡山 臨朐東北三十里大紀云軒轅踐位天下有不道者從而征之凡五十三征而奄有中區東至于海登凡山及岱宗西至崆峒登雞頭南至于江登熊湘北逐葷粥合符釜山竹書云堯放丹朱于丹水朱虛縣有丹山一名凡山黃帝所禪又名堯山下帶長阪曰破車峴東西二丹水出焉此山西接靈山東連方山遙見穹崇近則卑小豈上古之時爲瀕海之山後漸去海遠耳俗名几山蓋凡字訛也

雲門山 府城南五里上方號大雲頂有通穴如門可容百餘人遠望如懸鏡泉極甘冽崖壁上銜蚌殼結

齊乘

卷之一

六

石相傳海田所變如沈存中筆談載太行山崖螺蚌石子橫亙如帶之類齊地尤多又有碎石子或間瓦礫凝結作石殆不可曉蓋蚌石雜沙土凝者水所漬也石子自凝成石者氣所化也豈天地之終萬物皆碎爲塵及其開闢漸復凝聚元氣查滓中融化未盡者猶有其質邪以理逆之無足怪者雲門之東曰劈山山峯分裂如劈古名劈頭山西則駝山三山聯翠障城如畫宋熙寧間知青州盧士宗山路記云營丘東秦舊服周環衆山雲門爲之冠然此山實不聞于天下其磨崖題刻有宋慶歷八年富文忠公題名七人熙寧二年歐陽文忠公六人四年趙清獻公二人

吳文肅公奎十一人政和五年安撫使梁子美十七人金泰和閒亦有益都少尹夾谷璋十一人然則雲門絕景前賢題品尙矣圖經散逸之後乃不得與龍山虎丘角雄天下爲可惜也故特表而出之云

堯山 三齊略云在廣固城西十里堯巡狩所登遂以爲名山頂有祠祠邊有柏樹枯而復生不知年代此山正臨廣固廢城才二三里去今府城乃十里耳唐開元三年青州刺史王昕碑亦云堯山者齊記謂堯巡狩所登大歷八年平盧淄青節度使李正己碑云魏神龜三年青州牧臣沐載建祠及李乾暉碑陰疏棟宇甚盛今皆不存中統初益都同知劉仁傑始立

齊乘

卷之一

七

廟設像紀石又有宋熙寧小碣凡五碑余按堯狩此山殊不經見府東角崩山與方山相連伏琛齊記亦名堯山水名堯水地名堯溝以堯名者不一鄭康成云堯遊城陽而死葬焉大紀云堯葬城陽邱壠小葬具微前志謂濟陰城陽有堯冢然齊有丹山朱虛丹朱所封而齊之城陽比濟陰尤顯豈堯老而遊者齊呂之城陽歟邱壠微小不存而山川猶表其稱歟

嶼山 府城東五十里水經云康浪水出嶼山堯水逕嶼山東山在劇縣西南無事樹木圓峭孤特左思賦嶼鎮其左是也按齊城山勢俱帶西南東郊平原百餘里有香山者童然孤峙康浪發其南堯水逕其東

卽嶼山也元和志作箕山紀侯冢在山陰宋書云焦
恭祭冢得玉磬焉別見巨洋水條下山西南十里有
龍女泉辛酉夏旱欽禱此泉投文水中卽日雨露足
明年復禱亦如之嘗率村氓欲碑其事氓諾而不集
因附此以垂不朽云

牛山 臨淄南十里孟子曰牛山之木嘗美矣齊景公
登牛山北顧其國而流涕爲晏子所笑卽此山也又
白淵之齊道記曰黃邱北十里有鸞鷲峴下帶長澗
東北流經牛山山去此水八十餘里號曰牛頭水是
齊景公所登而歎處蓋言爲山濁水耳

狃山 臨淄南十五里齊風曰子之還兮遭我乎狃之
齊乘

閒兮卽此山也漢書作嶷亦作巖與狃通

稷山 臨淄西南十三里隋志曰臨淄有稷山齊記補
曰山舊有后稷祠故名又齊宣王嘗立孔子廟亦名
孔父山也

愚山 臨淄西二十里桑欽云山東有愚公冢山北有
愚公谷按韓非子云桓公逐鹿入谷問一老父此何
名愚公谷對曰臣畜犗牛生犢賣之而買駒少年謂
牛不能生馬遂持駒去傍鄰聞之以臣爲愚故名愚
公谷後人因爲立廟宋元豐閒禱澍有感封隱利侯
南曰杜山與愚山連阜水經云時水屈而西南有杜
山高士傳齊宣王獵于杜山閭邱先生長老十三人

相與勞王王賜父老不租父老皆謝先生獨不拜復
賜無徭役又不拜曰望得壽富貴于王王曰死生有
命非寡人也倉廩備災無以富先生大官無闕無以
貴先生閭邱曰非也選良吏平法度臣得壽矣賑乏
以時臣得富矣令少敬長臣得貴矣山有白龍灣神
祠宋政和賜額顯貺

商山 臨淄西三十里今隸高苑齊記補云南燕建平
三年立治逮今鼓鑄不絕崔琰述征賦云涉淄水過
相都登鐵山望齊密卽此山也寰宇記以爲密州之
鐵山者非是

孤山 濰州西四十里有穴曰龍洞禱焉雲出卽雨宋

齊乘

卷之一

九

封山神曰廣靈侯又以孟子言伯夷避紂居此北海
之濱因立廟封伯夷清惠侯叔齊仁惠侯崇寧大觀
碑刻存焉國朝至元十八年加封山神曰孚澤廣靈

侯伯夷昭義清惠公叔齊崇讓仁惠公

路史伯夷名允字公信叔

齊名致字公遠夷齊
諡也此說恐未必然

山東曰麓臺俗傳公孫宏讀書

處元和志以爲宏墓

陸山 昌邑縣南四十里濰水東岸漢封霍光爲博陸
侯食邑北海河東師古曰蓋鄉聚之名非縣也此博
陸聚之山耳故名陸山天寶六年勅改霍侯山南有
岉山又南峽山皆瀕濰水

浮來山 莒州西三十里春秋公及莒人盟于浮來卽

此也俗訛作浮邱山山半有莒子陵又東南馬鬣山又東屋漏山浮來之北則洛山黃華水發源于此合浮來衆水瀦爲莒之西湖湖西復有定林山山有定林寺亦名刹也

焦原山 莒州南四十里記云莒有焦原臨百仞之溪人莫敢近莒勇士登焉莊子伯昏瞿人射臨百仞之淵卽此漢志謂之崢嶸谷俗曰青泥術兩峽峻立如術故云

靄山 沂水縣西北三十里寰宇記山出紫石英好者暎徹如靄故名亦作岫山今日岫突固又東北螳螂山與大小二魯山相連有穴如門直入二十里眞仙

齊乘

卷之一

十

境也縣西四十里有磨石峴長二十餘里極險峻峴下卽堂阜鮑叔解管仲囚處俗訛作憚阜

高柘山 沂水東北百里漢志靈門有高柘山浯水所出東入濰又名巨平山俗曰臺頭山

望仙山 沂水西南百里縣中有望仙橋以爲王喬飛

鳥之地未詳

按列仙傳仙人王喬同姓名者有三人吹笙王子晉一名王喬在周飛鳥王喬

在葉縣食肉芝王喬在益州北平山在齊地琅邪者無之俗附會耳

蒙陰山 蒙陰縣南八里今名仙洞山琅邪承宮避亂

此山立性好仁不與物競人有認其禾者舍之而去

龜蒙二山 魯頌閟宮曰奄有龜蒙遂荒大東傳曰龜

蒙魯國二山也龜山近魯在今費縣西北七十里後

人指爲蒙山者山頂宛如龜形名不虛得夫子龜山
操曰余欲望魯兮龜山蔽之韓退之擬曰龜之大兮
祇以奄魯則龜爲魯之大山明矣蒙山者在龜山東
二山連屬長八十里禹貢之蒙羽論語之東蒙此正
蒙山也邢昺曰先王封顓臾爲附庸之君使主祭蒙
山蒙山在東故曰東蒙後人疑于東蒙之說遂誤以
龜山當蒙山蒙山爲東蒙而隱沒龜山之本名夫魯
人頌其本國之山川辭必審矣故今定蒙山爲龜山
東蒙爲蒙山以復古焉帝王世紀少昊自窮桑都曲阜註謂窮桑在東蒙山屬魯地然未知果是否 龜山下有古顓臾城山前玉虛宮唐仙人
賈神翁所建有英烈昭濟惠民王祠卽顓臾也山西

齊乘

卷之一

十一

南十餘里有漏澤澤有五穴春夏積水秋冬漏竭將

漏之時先有聲居人扈穴取魚隨種麥比水至麥已

收矣

費縣廡有唐大中間校書郎李潛漏澤賦并序石刻宋至和間出于泥中今斷裂爲二在醉翁

亭記碑傍醉翁碑者歐公同時人蘇唐卿爲費縣宰篆記文刻石立于此并刻歐公往復手帖皆精

山前陽口村有玉皇廟相傳老萊子故宅也陽口亦

山名後魏費縣理此高士傳老萊子隱蒙山著書十

五篇言道家用楚王嘗至其門其妻挾薪而至怪

車馬跡之多曰可食以酒肉者可加以鞭捶可授以

官祿者可隨以鈇鉞先生受人官祿爲人所制妾不

能爲人所制也夫婦遂相與逃去

路史又云老萊子卽老子邑干苦之

賴賴乃萊也孔子至楚見老萊子時已二百餘歲斑衣戲母側所問答皆禮事知非二人未知是否

羽山 地記舊在朐山縣西北九十里今屬沂州東南
百二十里殛鯀山也前有羽潭一名羽池左傳鯀化
爲黃能入于羽淵卽此淵傍生細柳野獸不敢踐郡
國志又云鍾離昧城南有羽泉亦殛鯀處其水恆清
牛羊不飲

艾山 左傳隱六年公會齊侯盟于艾杜註泰山牟縣
東南有艾山在今沂州城西三十里與大小鳳凰山
相近官溝水自小沂分流經艾山西注山前靈鎮侯
廟山東漢厚邱縣古城城西有酺神廟詳見祠宇

君山 一名抱犢山嶧州北六十里述征記曰承縣君
山有抱犢固壁立千仞去海三百里天氣澄明宛然

齊乘

卷之一

十二

在目山上有池深纔數尺水旱不增減平田數頃昔
有隱者王老抱一犢于上耕種後遇異人仙去故以
名焉漢曰樓山魏號仙臺其高九里周四十五里然
今嶧州城北三里別有仙壇山亦奇秀豈卽仙臺而
誤爲君山所掩邪

魯卿山 嶧州東北七十里國語季文子相宣成二君
妾不衣帛馬不食粟魯人思其遺惠爲之立廟亦名
季山俗作神峯山

夾山 嶧州北七十里通典東海懷仁縣有夾山春秋
之夾谷也左傳定十年公會齊侯于祝其實夾谷孔
子相漢有祝其縣

禹貢別州以山川定經界秦漢以降建置雖不常亦不敢失山川之限焉按抱犢魯卿諸山古圖經皆屬嶧州今則竝屬沂州訪之耆舊云李壇據齊以其姻親胡某者知沂州實張威福嶧州畏其逼盡割州東二十里外境與之逮今不改嗚呼壇賊據彈丸之地爲政不平如此固不足責職方氏因之豈矇不知邪

尼邱山 滕州鄒縣東北六十里有坤靈洞宣聖廟其東顏母山水經謂之防山防墓崩卽此有顏母廟南有昌平山夫子所生之鄉又南馬鞍山有孟母墓又南唐口山有孟子墓

鳧山 鄒縣西南五十里閼宮曰保有鳧嶧遂荒徐宅

齊乘

卷之一

十三

傳曰鳧嶧二山名也古有伏羲廟今云有伏羲墓按左傳顓臾風姓伏羲之後實司太昊之祀鄒魯有廟是也伏羲都陳有墓非也今訛作爺娘山

嶧山 鄒縣東南二十里京相璠曰嶧山在鄒縣繹邑之所依山東西二十里高秀獨出積石相臨殆無土壤石閒孔穴洞達相通有如數閒屋者俗謂之嶧孔避亂入嶧外寇雖衆無所施害永嘉之亂太尉郗鑒將鄉曲千餘家逃此今山南有大嶧名郗公嶧亦有古城遺跡史記始皇二十八年東行郡縣上鄒嶧山刻石頌德三代地理書曰始皇乘羊車登嶧山刻石處名曰書門

桃山 滕州南五十里御覽云卽華采山也又名義珠山山上有井不可窺窺者不盈歲輒死有鳥巢井上金喙黑色見則大水今訛作陶山謂有陶朱墓西微山謂有微子墓皆謬惟奚公山奚仲造車處上山軌轍猶存見地記云

牟婁山 密州安邱南二十里路史云古有巢氏治石樓山卽牟婁也本牟夷國密之諸城有婁鄉隋因置牟山縣今訛作朦朧按字書云牟婁微視也義或緣此

常山 密州南二十里東坡雩泉記曰禱雨未嘗不應蓋有常德者故謂之常山廟西南十餘步有泉古者

齊乘

卷之一

十四

謂吁嗟而求雨曰雩名之曰雩泉宣和間封山神靈濟昭應王

盧山 密州東南四十五里東坡詩註盧敖秦博士避難此山遂得道有盧敖洞飲酒臺聖燈巖障日峯三泉

馬耳山 密州西南六十里東坡詩試掃北臺看馬耳未隨埋沒有雙尖

北臺謂超然臺也

九仙山 密州東南百二十里坡云九仙在東武奇秀不減鴈蕩所謂九仙今已壓京東是也

漢琅邪郡有太一仙人祠

九所豈以此得名邪

琅邪山 密州東南百五十里齊景公放于琅邪卽此

吳越春秋越王句踐徙琅邪立觀臺以望東海秦始皇廿八年南登琅邪大樂之畱三月徙黔首三萬戶于臺下立石頌德御覽云碑有六百字可讀臺側有四時祠臺上有神泉人或汚之卽竭漢于此置琅邪縣武帝亦嘗登焉隋開皇十六年于此置豐泉縣大業初復爲琅邪唐省之今山下井邑遺跡猶存登山石道如故土人名曰御路

大朱山 膠州西南百二十里岸海名山也通典高密諸城縣有古齊長城自大朱山起蓋古齊長城起自齊西防門東逾泰山穆陵至大朱山海濱而絕非起自大朱也大朱山有石室晉永嘉中陳仲舉隱此得

齊乘

卷之一

十五

道仙去旁有小朱山錯水所出又東徐山方士徐福將童男女二千人會此入海采藥不返又東白猊山

風水所出

錯水風水俱東入海

大小二勞山 卽墨東南六十里岸海名山也又名勞盛山四極明科云軒皇一登勞盛山是也齊記云泰山自言高不如東海勞吳王夫差登之得靈寶度人經神仙傳樂子長遇仙人授以巨勝赤散方曰蛇服此藥化爲龍人服此藥老成童子長服之年百八十歲顏如少女登勞山仙去山高十五里周八十里此大勞也與小勞山華樓山疑卽陰山鼎足相聯大勞山有上清宮五代末華蓋仙人識趙太祖于側微宋人爲

建此宮近世有劉使臣者棄金符遯此山其徒建碧落宮

陰山 卽墨東南八十里上有小池深不盈尺水旱不增減池傍有石人并石馬蹄迹寰宇記云秦始皇至牢盛山望蓬萊立馬此山遣石人驅牢山不動因立於此石人今海濱山上往往有之

蓋勞山之高以其登陟之難則名勞

驅之不動又名牢也

不期山 卽墨東南四十里又名訓虎山後漢童恢爲不期令有虎食人恢檻獲二虎訓之曰王法殺人者死虎敢食人一虎垂頭服罪一虎吼躍不服服者殺之躍者縱之三齊記云鄭元教授此山草生如籬長

齊乘

卷之一

十六

尺餘堅韌異常號康成書帶余按勞山不期皆康成講學之地文澤涵濡草木爲之秀異千載之下第茅塞焉深可歎已

天井山 卽墨東十餘里上有一井極甘因號天井北二十餘里平地三穴湯泉出焉若有風從西北來則湯極熱不可入

女姑山 卽墨西南三十里山北舊有基漢志不期太一仙人祠九所及明堂武帝所起不期城西南有七神號曰女姑卽此又東有中祠山亦九祠之一又天室山亦祠所竝見寰宇記

田橫島 卽墨東北百里橫衆五百人死此四面環海

去岸二十五里可居千餘處蓋有竹島塔沙福島穀積車牛皆海中島名然登州蓬萊閣西復有田橫島在岸不在水非是

寧海山

大崑崙山 州東南四十里嵎夷岸海名山也秀拔爲羣山之冠仙經云姑餘山麻姑于此修道上昇餘趾猶存因名姑餘後世以姑餘崑崙聲相類而訛爲崑崙然今東夷人止名崑崙又有小崑崙與之相連宋政和六年封仙姑虛妙真人重和元年賜號顯異觀元遺山續夷堅志崑崙山石落村劉氏嘗于海濱得百丈巨魚取骨爲梁構屋曰鯉堂堂前一槐蔭蔽數

齊乘

卷之一

十七

畝忽夢女冠自稱麻姑乞此樹修廟劉漫許之後數日風雷大作昏晦如夜失槐所在相與求之麻姑廟中樹已臥廟前矣山有東牟侯神祠又金大定閒關西王祖師訪山前大姓于氏曰我前生修煉此山山有烟霞洞盜往登焉于氏以爲我世居此未聞有洞相與登山求之果見洞口有烟霞字跡大爲神異建祠紀石焉

廬山 州東二十里與大峴山東牟山相連北至海百里上有望海臺峴山有東牟侯祠又東繫馬山始皇于此繫馬草生猶作繫結之狀俗云繫馬碣州西南六十里兩鼓山兩峯鼓側相倚竝見寰宇記

文登山 文登縣東二里寰宇記始皇東巡召集文人
登此山論功頌德故名又東有鶻鷗山常有鶻鷗栖
其上

斥山 文登東南六十里爾雅云東北之美有斥山之
文皮焉蓋以海濱廣斥得名高門之族居此有千餘
家東齊于氏皆斥山望也欽之曾大父端叔府君自
斥山徙昌陽大父君瑞府君其仲子也又自昌陽徙
益都先考禮部公嘗命欽攷斥山于氏所出欽對曰
按氏族略于氏本周武王子邗叔所封之國在河內
邗城子孫以國爲氏去邑爲于後魏時有自東海隨
拓拔徙代改爲萬紐于孝文復爲于氏又有淳于姜

齊乘

卷之一

十八

姓之後唐避憲宗嫌名亦爲于氏此鄭氏之說也然
史記文王伐邗在野王縣西北書大傳正作于于蓋古諸侯
之國非始于邗叔也又夏相時于夷來賓子欲居九
夷于夷其一也或卽嶠夷之轉或于國之裔有奔海
濱而君長東夷者何其族之蕃而世之衍也斥山之
于祖此爲的先君頷之

之罘山 州西北五十里海濱史記秦始皇廿九年登
之罘刊石紀功三十七年又自琅邪使徐福采藥福
言苦大魚爲患於是連舟下海登之罘射巨魚郊祀
志齊有八祠之罘爲陽主山有陽主廟武帝太始三
年幸琅邪禮日成山登之罘稱萬歲子虛賦又云射

乎之罘其山入海中有壘石相傳武帝造橋兩石銘
猶存山高九里周五十里西南至福山縣長三十餘
里

召石山 文登之東三齊略云始皇造石橋渡海觀日
出處有神人召石下城陽一山石岌岌相隨而行石
去不駛神人鞭之見血今召石山石色皆赤伏琛齊
記曰始皇造橋觀日海神爲之驅石豎柱始皇感其
惠求與相見神曰我醜莫圖我形當與帝會始皇從
橋入海四十里與神相見左右有巧者潛以足畫神
形神怒曰帝負約可速去始皇轉馬前腳纔立後腳
隨崩僅得登岸今驗成山東入海道水中有豎石往

齊乘

卷之一

十九

往相望似橋柱之狀又有柱石二乍出乍没琛云始
皇渡海立此石標之以爲記山下有海神廟望海臺
始皇廟

成山 文登東北百五十里古不夜城側漢志亦作盛
山主祠曰盛山斗入海最居齊東北陽以迎日出武
帝太始三年幸東海作朱鴈之歌禮曰此山還而下
郵鰥寡今按召石與成山相近因始皇會海神故後
世遂呼成山曰神山山斗入海旁多椒島海艘經此
失風多覆海道極險處也

鐵官山 文登西百四十里去牟平城百里漢置鐵官
冶鑄遺跡尚存

五壘山 文登南五十里南北成行入海如壘又南石門山兩石聳立如門今按文登正南有鐵查山東連斥山甚奇秀圖經弗載豈古與斥山爲一或卽五壘石門之異稱歟

白鹿山 文登北四十里唐神龍三年刺史畢元愷於此獲白鹿進之故名又東北海邊有雞鳴島北海中有海牛島郡國志云海牛無角長丈餘紫色足似龜尾若鮎魚性捷疾見人則飛赴水皮堪弓韃脂可然燈與海驢島相近海驢常以八九月上島產乳其皮水不能潤可以禦雨竝見寰宇記海驢皮今有獲之者淺毛灰白作鱸魚斑又有海狸亦上牛島產乳見

齊乘

卷之一

二十

齊記

昌山 文登西南四十里有巨神島龍祠昌水出此山因氏焉南合黑水北納昌陽湯通名昌水西南過萊陽會五龍水南入于海昌陽湯極清溫在文登西七里名如意湯圖記文登有溫泉七所此爲最

般陽山

九目山 登州東南七十里齊記云山有九竅故名北二十里有龍山又北羽山之果水所出東北流合石門水入海寰宇記亦謂此爲殭鯨之山非也東海既有羽山鯨廟矣此偶同名耳又有朱高密神隱邱歷堂等山圖志弗載不可備述

沙門島

海市附

登州北海中九十里上置巡檢司海艘

南來轉帆入渤海者皆望此島以爲表誌其相聯屬則有鼉磯島牽牛島大竹島小竹島歷歷海中蒼秀如畫海市現滅常在五島之上海市之名始見江鄰幾雜志東坡詩序或謂類南海蜃樓蛟蜃噓氣所成殆不然欽嘗至登州海上訪之蓋海市常以春夏晴和之時杲日初升東風微作雲腳齊敷于海島之上海市必現現則山林城闕樓觀旌幢羶車駝馬衣冠人物凡世間所有象類萬殊或小或大或暫或久或變現終日或際海皆滿其爲靈怪赫奕豈蜃樓可擬哉蓋滄溟與元氣呼吸神龍變化浩不可測如佛經

齊乘

卷之一

二十一

所謂龍王能興種種雷電雲雨居于本宮不動不搖山海幽深容有此理欽以中秋後至海濱天已微寒知州事李述之詩人也亦相與禱于廣德王之祠越二日忽報云今晨風色雲氣海市當現同登賓日樓候之日初出大竹島上橫一巨艘長餘百尋述之指以示余余曰此海舟耳述之曰諦觀之何故不動須臾前後曳數旗劔戟紛紜忽不見惟有空舟漸變如長廊而滅述之曰風稍急而寒不然現未已也嗚呼神哉然則史漢所稱三神山蓬萊方丈瀛洲望之如雲未能至者殆此類耳且秦漢入海方士僅能往來于磯島之間偶見此異慕之爲仙亦不爲過非若今

人航海遠泛黑水洋外或飄蕩歲月而後返果有蓬萊仙山何不聞也斯言足破千古之惑矣

金山 亦名峿嵎山棲霞縣東北二十里以產金得名卽地記萊陽縣之黃銀坑也隋開皇十八年牟州刺史辛公義於此坑冶鑄得黃銀獻之山寺有隋碑淘金者所祖然隋唐以來皆守土官采以充貢爲數不多未見其害今則編戶置官歲定金額有增無減三時沙汰僅得分毫名曰淘金實則買金鑄納戶漸逃亡官復侵剝大約金戶一家之賦當他戶三倍之多而戶不勝其苦矣又指以金苗鑿地人家居宅墳壠皆所不免而民不勝擾矣其害視鹺竈有加夫宏羊

齊乘

卷之一

二十二

之罪良史已書辛公義作俑此毒可無誅乎故論及之士俗訛傳隋開皇中峿嵎山出黃金九屋俗儒便紀之于石爲可笑也

艾山 棲霞西北三十里山前溫泉可浴按棲霞縣本以山得名曰百澗北曲方嶺唐山靈峯覆甑積金芝陽公山碁山磁山哈嶺山哈嶺山在福嶺縣南不能具述大抵環縣皆山耳宋李常云吾州有重巖疊嶂不可名狀信然

萊山 黃縣西南五十里封禪書云齊八祠萊山爲月主山有月主真君祠一云萊陰山多仙聖所居

蹲狗山 黃縣西南三十里上有石如狗蹲伏氏云山

極靈劉寵微時途經此石犬吠之後爲太尉俗名狗兒山

蘆山 黃縣南四十里山下有真君宮金縣尹陳公碑云蘆童子晉時人九歲居此山食茯苓升仙唐封沖禧真君

三山 萊州北二十里漢志秦祠八神四曰陰主祠三山寰宇記云在掖縣北海之南岸顏監謂卽三神山者非也漢志曰蓬萊方丈瀛洲此三神山者其傳在渤海中則三神乃蓬萊方丈瀛洲之總稱豈海岸之三山也詳見海市論

浮游島 萊州北海中望若浮游然俗訛曰芙蓉

齊乘

卷之一

二十三

福祿山 萊州西五里出溫石可爲器又有金山馬鞍優游雄山土山君山皆縣境內

萬里沙 萊州北三十里夾萬歲水兩岸沙長三百里路史云雲陽氏陽帝處于沙掖有萬里沙祠秦皇漢武皆禱于此又北十餘里臨海有蓋石方圓五步上有窪樽古老相傳始皇鑿此盛酒以祭百神

大基山 萊州東十里金明昌閒劉國樞記云大基山道士谷後魏鄭文公修道之地流泉花竹地占高敞略無纖塵郡之甲勝

七子山 萊陽縣東南九十里山有八峯大峯居中餘若子然故曰七子

五龍山 萊陽南二十里四水自西北昌水自東北皆南流至山前五水相合名曰五龍南八于海山因名焉西有荆山寰宇記作葑山爾雅葑山葑者是也

高麗山 萊陽西南九十里司馬懿征遼東置戍于此以高麗爲名俗訛作峩峩山

火山 萊陽北三十里山多赤石故以火名已上竝見

寰宇記又有倉山林寺福阜三山

林寺福阜
陶金之地

又有獅

子峯俗傳金人詩俚甚今不取

大豁山 膠水縣西北二十里伏琛云盧鄉城東南有豁口曰大豁山北又有小豁山

嶠岬山 膠水北三十里寰宇記云山形嶠岬故名北

齊乘

卷之一

二十四

與蹲狗山相接天柱大澤皆一帶山也

明堂山 膠水東北四十餘里齊記云盧鄉城東三十里有明堂山與巨青山連出烏頭天雄又云藥石水出此合石瀆水北入于海

墨山 膠水東北六十里石色如墨故名水出茲山亦名墨水

金泉山 膠水東南四十里記云出桔梗防風

鳳喙山 招遠縣北三十里本名牛心至元六年陳節齋按部過之以其名俚故易之有詩石刻在縣治縣北五里有湯泉阜泉出阜南極熱東流合冷泉入池始可浴鳳喙山東有山中空俗曰虛空山又有齊山

望兒亦皆鄙俚自圖經散逸齊地山川例蒙俗惡之稱惟密州境內一山一水名存古雅蓋得坡仙手滌凡陋千載有光信賢人之澤遠矣

梓桐山 般陽府城東十餘里後有石壘園洞古老相

傳鬼谷子隱居名鬼谷洞

典略鬼谷弟子蘇秦張儀輩五百餘人鬼谷爲作窟

深二丈曰有能在窟中說使泣者則能分人主之地矣秦下說之鬼谷泣下卽此洞亦有鄭康

成廟金末燬于兵乙卯歲淄川令張孚重修澗水燕談云處士王樵隱此山詳見人物論梓桐東曰吉磨山出磨石有石碌井

原山 府東南七十里地志云原山淄水所出今名岳

陽山淄出其陰汶出其陽非止一水也山亦跨淄川

齊乘

卷之一

二十五

益都兩縣界云

甲山 府西南三十里水經註萌水出般陽西南甲山東北入瀧水今訛作夾谷山謂是齊魯會盟之地非也當從水經

鬻山 府北十里三齊略云鄭元刊註詩書棲遲此山上有古井獨生細草葉似薤俗謂鄭公書帶卽今鬻堂嶺與長白山相連元遺山濟南行記謂因范文正公學舍在焉故謂之鬻堂蓋未見古圖經耳

長白山 長山縣南三十里太平御覽云長白山者因此山雲雨長白故名之西南又有大湖山二山竝有石室敗漆船上有記皆謂堯時物元和志云於陵城

西長白山高二千九百丈周六十里昔陳仲子夫妻
隱此山阿有醴泉寺相傳志公卓錫之地宋范文正
公讀書寺中日惟一粥偶見窖銀覆之而不取後爲
西帥僧人求爲修寺公使發之取窖中銀適周於用
此與還術者子白銀相類世或未之聞也上下二書
堂在巒堂嶺會仙峯下皆宋代所建遺跡尙存今卽
寺內有范公祠舊說公母嫁齊居秋口公讀書此山
相去百里往來省親劬甚後知青州悲思不自勝秋
口在今顏神鎮土人亦名其處爲范公書堂按南岱
東沂山小泰之外沂之蒙山密之九仙卽墨之大小勞
寧海之姑餘般陽之長白皆三齊高大名山也餘不

齊乘

卷之一

二十六

得竝列

濟南山

歷山 府南五里一名舜耕山古有舜祠曾南豐齊二
堂記云舜耕歷山漁雷澤陶河濱作什器于壽邱就
時于負夏鄭康成釋歷山在河東雷澤在濟陰負夏
在衛地皇甫謐釋壽邱在魯東門之北河濱在濟陰
定陶西南陶邱亭是也以余考之耕稼陶漁皆舜之
初宜同時則其地不宜相遠孟子又謂舜東夷之人
二家所釋雷澤河濱壽邱負夏皆在魯衛之間東方
之地歷山不宜獨在河東在齊者是也世因河東雷
首山一號歷山瀉水所出舜娶堯女所居遷就附益

謂歷山爲雷首之別號不考其實由是言之則圖記皆謂齊之南山爲歷山舜所耕處故其城名歷城爲信然也或者不此之論乃備載陸魯望象耕鳥耘之辯可見其贅

龜蒙曰世謂舜田歷山象爲之耕鳥爲之耘聖德感召非也蓋耕者行端而履

深似象步耘者舉疾而畏晚如鳥喙

通典云山有太甲冢未詳歷山南

屬泰山東連琅邪崇岡疊嶂脊脈不斷欽嘗有詩云濟南山水天下無晴雲曉日開畫圖羣山尾岱東走

奏音

海鵲華落星青照湖此濟南山勢也

廟山 府城東南十里三齊記云因舜廟得名遺山濟南行記作妙山非是

函山 府南二十里按西陽雜俎云齊郡函山有鳥名齊乘

卷之一

二十七

王母使者漢武登此山得玉函帝下山玉函化爲白鳥飛去世傳山上有王母藥函鳥常守之因號函山有九十谷又名臥佛山

奎山 府城西南十五里三齊記奎山公神似豬頭戴珠冠殷時有道士隱此野火四發道士祈天卽雨今人遇旱燒山禱雨多應又北有匡山世傳太白讀書於此又北曰粟山曰藥山山出陽起石極佳故名

華不注山 府東北十五里左傳成公二年魯季孫行父帥師會晉郤克及齊頃公戰于鞏齊師敗績逐之三周華不注又云從齊師至于靡笄之下逢丑父與公易位使公下如華泉取飲則此山亦名靡笄

靡與同

地記又名金輿道元謂單椒秀澤不連邱陵以自高
虎牙傑立孤峯特拔以刺天青崖翠發望同點黛信
然山前道院中有石刻太白諸賢詩院前卽華泉水
與小清合流

鵲山 府北二十里王繪太白詩註云扁鵲煉丹于此
俗又謂每歲七八月烏鵲翔集故名按扁鵲盧人近
在今長清縣地煉丹此山者是

古有鵲山院
見陳後山詩

黃山 府西南六十里山周如城岱陰諸谷之水奔流
至山西匯爲池圍數畝不溢而伏山卽渴馬崖也伏
流至府城之西而出卽趵突泉也

西龍洞山 府南六十里道元云苻秦時有竺僧朗事

齊乘

卷之一

二十八

佛圖澄碩學淵通與隱士張巨和居此因號朗公谷
今有朗公寺亦三齊名刹歷代有碑谷有琨瑞溪水
過玉符山又名玉水至祝阿入濟今溪水東西分流
山中人云西發趵突東發百脈驗之信然謂徑入濟
者誤也龍洞西南有方山長清縣界疑卽水經之玉符山
又西隔馬山長清東南左傳襄公十八年晉伐齊齊侯禦
諸平陰塹防門而守之廣里齊師懼夜遁夙沙衛連
大車以塞隧而殿殖綽郭最曰子殿國師齊之辱也
于姑先乎乃代之殿衛怨二子遂殺馬于隘以塞道
欲使晉師得之卽此後人呼爲隔馬山山東北曰神
林有隔馬神君祠祠南有一潭清澈見毫髮歲旱邑

人祈聖水禱雨輒應唐宋碑刻存焉又南青崖山金

亂嚴侯率義兵堡此

皆古齊山今屬泰安

東龍洞山

府東南三十里山如重甌

音言甌也爾雅重甌隄此山類

之

西洞透深一里許秉火可入東洞在萬仞絕壁之

上洞口釜鬲尚存烟火之跡如墨蓋昔人避兵引絙

以上中必有泉不知其深幾許耳有翠屏巖獨秀峯

三秀峯峯側龍祠郡邑禱雨極應宋封靈虛公九域

志又云禹登山謂禹治水嘗登

龍盤山

章邱縣南二十八里齊記云周初有神龍潛

此山遂名有神跡祠姜嫄所履伏琛云宋濟南太守

蕭承之立祠山上其妻亦學履而產齊帝按姜嫄炎

齊乘

卷之一

二十九

帝後有駘氏之女高辛世妃后稷母也駘舜封稷作

邠元和志邠在京兆武功縣路史駘在費縣南遠者

去此數千里近亦五百餘里姜嫄未嫁不應至此既

嫁則高辛都亳河南偃師地豈在齊乎伏琛之論尤

覺誕妄

樂盤山

章邱南二十七里齊記云下有樂盤城卽平

陵王與章邱侯餞送之地

東陵山

章邱南二十八里龍盤山相連寰宇記云盜

跖死處山南有盜跖冢

危山

章邱東北五里寰宇記云漢文帝十六年封齊

悼惠王子爲齊孝王景帝三年孝王與吳楚通謀自

殺葬于此墓在山椒

女郎山 章邱東南七里又號小田山齊記云章亥有三女溺死葬此有三陽洞俗云有子張墓卽章女冢所謂章邱者耳

雞山 章邱西南四十里齊記云有神雞晨鳴于此候之獲一石潔白如玉因以名焉巨合水出此山下俗名雙女泉

湖山 章邱正南五十里明秀鄉相傳古有仙翁仙婆修道此山皆得壽考今有公婆廟遇旱禱雨卽應

亭山 章邱西南六十里桀死處湯放桀于南巢書傳皆謂今廬江巢縣獨尸子云放之歷山豈古有巢氏

齊乘

卷之一

三十

治琅邪之石婁山齊地亦有南巢邪又桀死後其子淳維妻其衆妾遁于北野隨畜轉徙號曰葷育若桀死南方其子豈能北遁自齊奔漠則易矣隋唐有亭山縣見古蹟

啞婦山 鄒平縣西十三里俗呼啞婦山謂夫子去齊道此山婦人陽瘖以滅跡蓋因孔子去魯之歌曰彼婦之口可以出走而附會此名直野語耳

大山 無棣縣東北八十里

小山 無棣西北一百二十里二山圖經弗載然濱棣瀕海廣斥無高峻之山故志

平原嶺 德州東南七十里有望遠臺壽公菴嶺上鹿

角關

齊乘卷一

臨桂胡德琳書巢校

齊乘

卷之一

三十一

齊乘卷一考證

沿革

商制九有以青爲徐 按爾雅釋地齊曰營州郭注云自岱東至海此蓋殷制邢疏云此營州則青州之地也是商之九州以青爲營于氏以濟東之徐當之誤分野

唐一行山河兩界圖 新唐書天文志引作兩戒古字通用

沂山

酈道元水經曰大弁山與東泰山連麓沭水出焉 當作水經注後凡引酈注直稱水經者放此

齊乘考證

卷之一

一

仰天山

崇寧五年封濟侯 按山川神祠封號鮮有用一字者據臨朐縣志作豐濟侯

嶼山

元和志作箕山 按太平寰宇記作箕山非元和志愚山

桑欽云山東有愚公冢山北有愚公谷 按水經注時水西北逕黃山東又北歷愚山東有愚公冢時水又屈而逕杜山北有愚公谷于氏割山東山北屬下句失其讀矣且此酈道元之言不關桑欽也 水經三國時人作非桑欽欽西漢末人班氏地理志引欽說

者七不言其有水經也自唐藝文志以水經爲欽作
後人多承其誤惟此條以酈注屬之桑欽尤堪詫異
耳

商山

崔琰述征賦云云卽此山也寰宇記以爲密州之鐵山
者非是 按太平寰宇記臨淄縣鐵山引崔琰述征

賦云涉淄水過相都

相都謂斟灌國故
城在壽光縣東

登鐵山望齊

密卽此山又于安邱縣鐵山下別引崔琰述初賦序
云琰聞比鄭徵君者名儒善訓遂往造焉涉淄水歷
杞焉過杞都之津登鐵山以望高密兩賦題目不同
而皆有鐵山之名封演聞見記云漢末崔琰于高密

齊乘考證

卷之一

二

從鄭元學遇黃巾之亂泛海而南作述初賦則其爲

密州之鐵山明矣

杞都之津謂安邱淳于城
東北濰汶兩川所會也

述征賦

或別指臨淄鐵山而言然其文在相都之下亦于道
里不合于氏以在青者爲是在密者爲非未詳考也

桃山

御覽云卽華采山也 太平寰宇記作華萊山御覽同

大小二勞山

又名勞盛山 顧氏曰寰宇記秦始皇至勞盛山望蓬
萊後人因謂此山一名勞盛誤也勞盛二山名勞卽
勞山盛卽成山史記封禪書七曰日主祠成山成山
斗入海漢書作盛山古字通用齊之東偏環以大海

海岸之山莫大于勞成二山故始皇登之古人立言
尚簡南勞而北盛則盡乎齊東境矣

齊記云泰山自言高不如東海勞 元和郡縣志引作
太白自言高

召石山

不言去縣里數寰宇記
云在縣東八十五里

三齊略云始皇造石橋渡海觀日出處有神人召石下
城陽一山石岌岌相隨而行石去不駛神人鞭之見
血今召石山石色皆赤 按藝文類聚引三齊略記
曰始皇作石橋欲過海觀日出處于時有神人能驅
石下海城陽一山石盡起立巍巍東傾狀似相隨而
行石去不速神人輒鞭之盡流血石莫不悉赤至今
亦爾今于氏引此文城陽上失一海字語意不明又
按寰宇記作下城陽一十三石遣東下岌岌相隨如
行狀城陽山石豈有定數恐亦誤也

金山

黃銀坑 按山海經注黃銀出蜀中與金無異但上石
則色白新唐書地理志昌陽縣東百四十里有黃銀
坑貞觀初得之房杜列傳帝嘗賜元齡黃銀帶曰如
晦與公同輔朕今獨見公泫然流淚曰世傳黃銀鬼
神畏之更取金帶遣元齡送其家是黃銀乃銀之別
種非黃金也以金爲通名則可耳元史世祖本紀至
元五年閏月令益都漏籍戶四千淘金登州棲霞縣

每戶輸金歲四錢此于氏所謂歲定金額者也

萬里沙

窪樽 太平寰宇記作汚樽音義與窪同

五龍山

西有荆山寰宇記作葑山爾雅葑山葑者是也 按寰

宇記葑山多葑菜爾雅云葑山葑也今于氏不言山

多葑菜而但引爾雅釋草之文非寰宇記本義矣

葑音

育本或作葑
傳寫之譌

甲山

水經注萌水出般陽西南甲山東北入瀧水 瀧今本

作隴朱謀埠箋云疑當作瀧水有隴雙二音按水經

齊乘考證

卷之一

四

注近世絕少善本于氏所見蓋與今本不同第二卷

隴水條下放此

華不注山

左傳從齊師至于靡笄之下則此山亦名靡笄 顧氏

曰齊乘華不注亦名靡笄山非也左傳云從齊師于

莘云六月壬申師至于靡笄之下云癸酉師陳于鞍

曰逐之三周華不注曰丑父使公下如華泉取飲其

文自有次第鞍在華不注之西而靡笄又在其西可

知金史長清縣有劓笄山 又按史記晉世家晉伐

齊戰靡下徐廣曰靡一作歷故或以歷山為即靡笄

山要之非華不注之異名也

東龍洞山

宋封靈虛公 按宋元豐二年封龍洞神為順應侯敕
牒碑今尚存豈元豐後又加封公號與

亭山

桀死處 按尚書正義曰周書序有巢伯來朝鄭元云
南方之國桀之所奔蓋彼國也以其國在南故稱南

耳是則桀奔巢國加南字以別于北方之巢

有巢氏
都或云

在琅邪或
云在隰州 其不在齊地明矣于氏多附會此尤其顯

然者